

Pa ubica Museo Arqueologico: **KE HUBO DI E PROYECTO PA CUMPRA "CAS ECURY"**

ORANJESTAD (AAN) -- Lo ta interesante pa haya sa kico a para cu e proyecto pa compra e "Cas Ecury", situa den e puro curazon di nos ciudad, pa entre otro, ubica Museo Arqueologico, cual ta conta aworaki cu un espacio basta limita.

Cumpra di e edificio "Ecury" ta un plan cu tin varios aña bieu, y por corda cu den un entrevista cu Ministro di Cultura, sra. Lili Beke, el a yega

di bisa DIARIO cu e procedure pa adkiri e lugar aki tabata biniendo cla. Esaki a sosode na 1995, pero te awor nunca mas a tende riba esey. DIARIO tin entendi cu Museo Arqueologico tin yen di proyecto importante pa Aruba, algun a worde concreta otronan no, y p.e. pa sigui haci investigacion y cobamento tuma lugar, logicamente mester di mas espacio pa exhibi e piezanan

cu ta ser haya.

Desde cu a muda pa Instituto di Cultura, relaciona cu drechamento di e antiguo edificio di Museo, na Zoutmanstraat, Museo Arqueologico no tin un espacio adecua. Esun actual enberdad ta chiquito.

Un alternativa interesante tabata e adkision di Cas Ecury, cual financiamiento lo tabata na encargo di Holanda, y cu segun redaccion por a

compronde famia Ecury lo a bende na un prijs excepcionalmente bon, ya cu e ta pa un bon causa cu ta engrandece nos cultura y patrimonio.

Pero di e tema aki "ni a, ni b" ta worde scucha mas for di gobierno. DIARIO lo trata di conversa cu Evelino Fingal, riba e tema importante aki.